

noka paSta'ay katiyawan

kaspengan koSa'en noka tatini' Sinbil kak'i'iyah, kataniSowawen,
kapatawawen mita'. matawaw ka kaspengan maybalbalay 'okik
papa'ahae'. paSpaSo'ahae' kaspengan hayza' ka katiyawan.

paSta'ay So: 'ina papoe'oe' koSa'en mango' ila, ray taew'an ka tatini'
labaki', koko' pa'alowa' hi yaba' ki 'oya' komoSa'-- "hata'ay ila! 'izi' i
Sebet ka kokoring!" 'isa:a' hi yaba' ki 'oya' ma' manabih 'inya'om ka
korkoring komoSa'-- "hata'ay ila, moyo mina SaSokayzaeh kil
mae'iyah 'izi' 'a'angang kakoring! 'izi' 'oSa' ray lolongan ki ba:la'
o 'izi' 'osa: ka bato'! 'okik ra:ami 'am Somohoro: hi koko' ta'ay!" yami
korkoring ma' bazae' a tomal ka pinayaka:i' noka tatini'.

ka tatini' ma' 'okik koSa' 'okay Sebet nanaw ka
korkoring, 'ana 'ahoe' ma' 'okay Sebeti 'oyaeh! nak So: 'ah'aeael a hiya'
mowa:i' ray taew'an, ni yaba' ki 'oya' ma' pasi'aelen o parae'oe:en ka
pinobae:ah a pinoSakan. 'okay karke: 'ini 'ah'aeael. 'oka' ila, 'ahae'
naehan koSa'en 'ahae' halapaw So: 'omaySi' ila, 'ana kano'
ma' 'awmomza' pon'a:iS! 'am papa'oSa' 'izi' kita' ka kominSibok! hini
tomiyaw a tomal!

homawan SaySiyat 'okay kiSno kapa:tol nom paSta'ay. 'ina papoe'oe'
ila 'isa:a' kayzaeh lomoehlohay kiSnopaSta'ay. nakhini So: rohaenan ila
yako kama taniSowaw hi yaba' ki 'oya' rima' kala 'aza' tatoroe' ma:tol.
potngor kala 'aza' minSa'la' pa'eseng naehan maSkan sowiti' ka babina' ray
kangkang komi:im ila ka kaSa:engan. tani kamatintin'alay ma:tol
tabin 'iwazwaz sizaeh!

yaba' 'ina manabih komoSa' lomoehlohay kiSnopaSta'ay, noka rara:ol
ka "ka:i' napi' ka laro'" 'okay pa:toli. sa'owaz So: 'am hinray
kapayhahila:an roma:ol ila hi koko' ta'ay, 'isa:a' kayzaeh ma:tol ka "ka:i'
napi' ka laro'"! hini 'ahae' ma' tomiyaw a tomal!

yako korkoring na' 'okik ra:am a tomal paSta'ay kano' howaw.
koSa'en kakiSnopaSta'ay ma' haSa' 'oyaeh! 'oka' o ni yaba' 'ar'araSen,
tortoroe'en. yami 3 'aeael ma' ra:am So: hata'ay ila mango' tomiyaw ka
kano', 'izi' 'a'angang sasokayzaeh kil mae'iyah, 'izi' 'oSa' ray
ba:la', 'izi' 'osa: ka bato'... hini tinortoroe' noka tatini' kaSili'in niya'om
ray ta'oeloh 'ana 'inowan 'am 'okay ngowipani!

paSta'ay 祭典禁忌

每個祭典都有不同的禁忌。paSta'ay 祭典日期決定就進入禁忌期，不可以打小孩、不可以吵架、去河邊或隨意丟石頭！孩子很聽從長輩的話。若有人來家裡作客，不可以小氣。另外懷孕的夫妻不能參與，最後送靈折赤陽木時更不能看。

平時不能唱 paSta'ay 祭歌，決期之後才能開始練習，到了主祭家先綁芒草然後跟著領唱者練唱到很晚才結束。第一首邀請之歌第一段要真正到了迎靈的時候才能唱。因為爸爸總是經常叮嚀，我們永遠都不會忘記 paSta'ay 禁忌。